

## Fa'aarara'a

---

Tai'o mahana : 25 nō 'ātopa 2016

TE EKĀLESIA A  
IESU MESIA  
I TE FEIA MO'A  
I TE MAU MAHANA  
HOPEA NEI

Nā : Te mau hui mana fa'atere rahi ; te mau Hitu 'Ahuru ārea ; te mau peresideni titi, misiōni 'e mata'eina'a ; te mau 'episekōpo 'e te mau peresideni 'āma'a ; te mau melo nō te mau 'āpo'ora'a titi 'e pāroisa

Nō 'ō mai i te : Tuha'a fa'atere nō te autahu'ara'a 'e te 'utuāfare (801-240-2134)

Tumu parau : Tāvini i te ta'ata e fa'ahina'aro ra i te ta'ata nō tōna iho 'āpeni

---

I teienei, tē vai ra teie mau mātēria tauturu 'āpī nō ni'a i te fa'ahina'arora'a te hō'ē ta'ata i te tahi atu ta'ata nō tōna iho 'āpeni, nō te mau ta'ata, te mau 'utuāfare 'e te mau 'āpo'ora'a pāroisa :

- Tumu parau « Fa'ahina'arora'a i te ta'ata nō tōna iho 'āpeni » i roto i te Gospel Topics i ni'a i te LDS.org (hi'o i te parau i 'āpitihiā)
- Mau ha'api'ira'a a te 'Ēkālesia (hi'o i te parau i 'āpitihiā)
- Mau uira'a ui-pinepine-hia (hi'o i te parau i 'āpitihiā)
- Tahua 'itenati Mormonandgay.lds.org nā roto i te reo peretāne
- Mau mātēria nō te tāvinira'a (ministering.lds.org), nā roto e 10 reo nō te mau melo 'āpo'ora'a pāroisa 'e te titi i ni'a i te LDS.org, i te vāhi nō te mau mātēria tauturu nā te feiā fa'atere 'e te pāpa'i parau.

E tuatāpapahia teie mau mātēria i roto i te mau rurura'a 'āpo'ora'a titi 'e te pāroisa.

# Fa'ahina'arora'a i te ta'ata nō tōna iho 'āpeni

25 nō 'ātopa 2016

TE EKĀLESIA A  
IESU MESIA  
I TE FEIA MO'A  
I TE MAU MAHANA  
HOPEA NEI

---

*Nō roto i te Gospel Topics [Mau tumu parau nō te 'evanelia] i ni'a i te topics.lds.org:*

Te fa'ahina'arora'a ta'ata nō tōna iho 'āpeni, 'o te fa'ahina'arora'a ia i roto i te hō'ē ta'ata, i roto i tōna tino 'aore rā 'o te hina'aro e ta'oto i te hō'ē ta'ata nō tōna iho 'āpeni. E mea ta'a 'ē tō terā 'e terā ta'ata fa'ahina'arora'a i te ta'ata nō tōna iho 'āpeni. Tē vai ra e fa'ahina'aro noa i te ta'ata nō tōna iho 'āpeni 'e tē vai ra e fa'ahina'aro i te ta'ata nō nā 'āpeni e piti.

Tē fa'ata'a 'ē nei te 'Ēkālesia i te fa'ahina'arora'a i te ta'ata nō tōna iho 'āpeni 'e te 'ohipa pā'i'a [pētea]. Te ta'ata e fa'ahina'aro ra i te ta'ata nō tōna iho 'āpeni 'aore rā tei parauhia e tāne pā'i'a, e vahine pā'i'a 'aore rā e airua [bisexuel], e nehenehe tāna e 'euhe 'e e ha'apa'o i te mau fafaura'a 'e te Atua ma te 'āmui roa, ma te ti'amā, i roto i te 'ohipa a te 'Ēkālesia. Te paraura'a iāna 'ei tāne pā'i'a, 'ei vahine pā'i'a 'aore rā 'ei airua, e 'ere ia te reira i te hara 'e e'ita e 'ōpanihia i terā ta'ata te 'āmui ra i te 'Ēkālesia, te ravera'a i te mau pi'ira'a 'aore rā te haerera'a i te hiero.

'Ua riro te vi'ivi'i 'ore 'ei tuha'a rahi nō te fa'anahora'a a te Atua nō tō tātou 'oa'oa. 'Ua fa'ata'ahia te mau 'atira'a [ta'otora'a i te hō'ē ta'ata] nō te hō'ē tāne 'e te hō'ē vahine tei fa'aipoipohia 'e 'o te fafau i te here motu 'ore i te tahi e te tahi. Tē 'ōfati nei te mau 'atira'a i rotopū i te tāne 'e te vahine fa'aipoipo 'ore, 'aore rā i rotopū i nā ta'ata hō'ē ā 'āpeni, i te hō'ē o te mau ture rahi roa a'e a tō tātou Metua i te Ra'i ma te ārai i tō tātou haerera'a mure 'ore i mua. Te ta'ata ato'a e 'ōfati i te ture nō te vi'ivi'i 'ore, noa atu te huru o te fa'ahina'arora'a, e nehenehe tāna e faite 'e te Atua nā roto i te tātarahapara'a. 'Ei mau pipi nā te Mesia, e pāto'i tātou i te ravera'a vi'ivi'i pae mōrare ma te tūtava i te riro mai iāna ra te huru. E 'imi tātou i te arata'ira'a a te Vārua Maita'i 'e te tauturu a te Fa'aora, tei 'ite nāhea i te fa'a'eta'eta ia tātou 'o tē fa'ahemahia ra (hi'o 1 Korinetia 10:13 ; PH&PF 62:1). Mai te peu e topa tātou i raro a'e i te mau fa'ahemara'a o te 'atira'a 'e 'ia 'ōfati tātou i te ture nō te vi'ivi'i 'ore, e nehenehe tā tātou e tātarahapa, e fa'a'orehia te hara 'e e ho'i fa'ahou 'ei melo ti'amā i roto i te 'Ēkālesia.

'Aita paha tātou i 'ite i te tumu mau e fa'ahina'aro ai te tahi ta'ata i te ta'ata nō tōna iho 'āpeni, e fifi rave 'atā rā 'e te pāpū nō vetahi 'e e tuha'a ho'i nō te mau tāmatarā'a ta'ata nei. 'Ua ta'a maita'i roa i te Fa'aora Iesu Mesia te mau tāmatarā'a ato'a tā tātou e fa'aruru nei i ni'a i te fenua nei, 'e e nehenehe tā tātou e fāriu atu iāna nō te tāmāhanahanara'a, te 'oa'oa, te tīa'ira'a 'e te 'āvei'a (hi'o Alama 7:11–12). Noa atu te mau tāmatarā'a tā tātou e fa'aruru atu i roto i te orara'a, e tamari'i ana'e tātou nā te Atua, 'e e tano tātou i te hāmani maita'i 'e i te aroha aumihi i te tahi 'e te tahi (Roma 8:16–17). 'Ia fa'atupu tātou i te fa'aitoitorā'a, e fa'atupu tātou i te aroha 'e te auma'i nō te tahi 'e te tahi ma te fāna'o ato'a mai i tā tātou hi'ora'a tāhō'ē 'e te fa'aro'o.

# Mau ha'api'ira'a a te 'Ēkālesia

25 nō 'ātopa 2016

TE EKALESIA A  
IESU MESIA  
I TE FEIA MO'A  
I TE MAU MAHANA  
HOPEA NEI

---

*Nō roto mai i te mormonandgay.lds.org.*

## 'Ua here te Atua i tāna mau tamari'i ato'a

'Aita atu e ha'apāpūra'a hope nō te hōhonu 'e te rahi o te here o te Atua maori rā tōna hina'aro 'ia fa'atusia i tāna Tamaiti 'ia ti'a ia tātou, tāna mau tamari'i, 'ia upo'oti'a i ni'a i te pohe 'e 'ia pūpūhia mai ho'i te ora mure 'ore. « I aroha mai te Atua i tō te ao, 'e 'ua tae roa i te hōro'a mai i tāna Tamaiti Fānau Tahī, 'ia 'ore 'ia pohe te fa'aro'o iāna ra, 'ia roa'a rā te ora mure 'ore » (Ioane 3:16). 'Aita atu e fa'a'itera'a nō te here o Iesu Mesia maori rā tōna hina'aro 'ia hōro'a i tōna ora 'ei 'aufau nō te hara o te ta'ata nei, 'ei ho'ona i te mau māuiui ato'a 'e te mau mea ti'a 'ore 'e 'ei 'ōfati i te mau tā'amu o te pohe nō tātou pā'āto'a nei (hi'o Alama 7:11–13). « 'Ia hōro'a te ta'ata i tōna iho ora nō tōna ra mau tau'a, 'aita roa e ta'ata aroha 'ē atu i tei reira » (Ioane 15:13).

I roto i te hō'ē a'ora'a i te 'āmuiira'a rahi nō 'ātopa 2009, 'ua fa'ata'a mai te peresideni Dieter F. Uchtdorf nō ni'a i te here o te Atua :

« E 'ore ho'i te Atua e hi'o i te rāpae o te ta'ata. Tē ti'aturi nei au i te reira. 'Aita roa atu 'oia e ha'afifi nei mai te mea ē tē ora ra ānei tātou i roto i te hō'ē aora'i 'aore rā i roto i te hō'ē fare ha'iha'i, e ta'ata ha'aviti ānei 'aore rā e ta'ata purotu 'ore, e ta'ata tuiro'o ānei 'aore rā, 'ua mo'e 'ē roa. Noa atu ē, 'aita tō tātou huru i maita'i hope roa, 'ua here hope roa te Atua ia tātou. Noa atu tō tātou mau hapehape, 'ua here hope roa 'oia ia tātou. Noa atu tē mana'o nei tātou ē, 'ua mo'e tātou 'e 'aita e 'avei'a, e pū'ohu hope roa te here o te Atua ia tātou.

« 'Ua here 'oia ia tātou nō te mea 'ua 'i 'oia i te mo'a, te vi'ivi'i 'ore 'e te here fāito 'ore. E faufa'a rahi tō tātou i mua i te Atua 'eiaha nō tō tātou parau fa'ata'ara'a, nō te mea rā e tamari'i tātou nāna. 'Ua here 'oia ia tātou tāta'itahi » (« The Love of God », 'āmuiira'a rahi nō 'ātopa 2009).

'Ua here te Atua ia tātou pā'āto'a. 'Ua here 'oia i te ta'ata nō terā 'e terā fa'aro'o 'e ia rātou ato'a 'aita e fa'aro'o. 'Ua here 'oia i te feiā e māuiui nei. 'Ua here 'oia i te ta'ata moni mai tāna e here nei i te ta'ata veve. 'Ua here 'oia i te ta'ata noa atu te nūna'a ta'ata 'e te peu tumu, te ta'ata fa'aipoipo 'e te ta'ata 'ōtahi, 'e 'ia rātou ato'a e fa'aruru nei i te fa'ahina'arora'a ta'ata nō tō rātou iho 'āpeni 'aore rā tei parauhia e tāne pā'i'a, e vahine pā'i'a 'aore rā te airua. 'E tē tīa'i nei te Atua 'ia pe'e tātou i tōna hi'ora'a.

## 'Ua fa'auehia tātou 'ia here i te Atua 'e i te tahi 'e te tahi

« Hina'aro 'oe i tō Atua ia Iehova ma tō 'ā'au ato'a, 'e ma tō vārua ato'a, 'e ma tō mana'o ato'a. 'O te ture mātāmua teie 'e te hau i te rahi. 'E mai te reira ato'a te piti, e aroha atu 'oe i tō ta'ata tupu, mai tō aroha ia 'oe iho » (Mataio 22:37–39).

« Teie ta'u parau, 'ia aroha 'outou ia 'outou iho, mai iā'u e aroha atu ia 'outou na » (Ioane 15:12).

E fa'a'ite tātou i tō tātou here i te Atua nā roto i te ha'apa'ora'a i tāna mau fa'auera'a (hi'o Ioane 14:15) 'e nā roto i te herera'a i te tahi 'e te tahi (hi'o Ioane 13:34). Mai te peu e melo 'utuāfare tō 'outou 'aore rā e hoa e fa'aruru nei i te fa'ahina'arora'a ta'ata nō tōna iho 'āpeni 'aore rā tei parauhia e pā'i'a, 'a here ia rātou. 'Ua nā 'ō mai te peresideni Henry B. Eyring :

« Mai te mea 'ua hina'aro 'outou e fa'aea noa i pīha'i iho i te hō'ē ta'ata tā 'outou i poihere, 'o tei fa'aātea rā i teienei, 'ua 'ite 'outou e aha te rave. E 'imi i te rāve'a nō te paraparau ia rātou, e fa'aro'o ia rātou 'e e 'itehia mai ia 'outou te mau rāve'a nō te rave i te tahi 'ohipa nō te tahi 'e te tahi. Pinepine roa te reira i te tupu, tāmāu noa ato'a te reira ē hōhonu noa ato'a atu te tā'amura'a au i te tahi. Mai te peu e rahi roa te taime 'aita e paraparaura'a, 'aita e fa'aro'ora'a 'e 'aita e ravera'a, e paruparu mai te tā'amura'a. E mea maita'i roa te Atua 'e te pūai hope, e mea tāhuti tātou nei. 'O 'oia rā tō tātou Metua, 'ua here 'oia ia tātou, 'e tē pūpū nei 'oia i te hō'ē ā rāve'a nō te ha'afātata iāna mai tā te hō'ē hoa rahi e rave. 'E e nā reira ato'a ho'i 'outou i te rave : e paraparau, e fa'aro'o 'e e rave » (« To Draw Closer to God », 'āmuira'a rahi nō 'ēperēra 1991).

E fa'a'ite 'outou i tō 'outou here i te Atua nā roto i te herera'a 'e te tāvinira'a ia vetahi 'ē. « 'E inaha, e fa'a'ite atu vau ia 'outou na i taua mau mea nei, 'ia 'ite 'outou i te pa'ari ; 'ia 'ite ho'i 'outou ē, 'a tāvini ai 'outou i te ta'ata nei te tāvini ia 'outou i tō 'outou Atua ra » (Mosia 2:17).

E aha te aura'a nō te herera'a i te tahi 'e te tahi ? E mea aupuru te here. E tari'a fa'aro'o tō te here. E tauahi mai te here. E fa'auru te here. 'O te here te pū nō tō tātou rirora'a 'ei ta'ata, inaha ho'i e tamari'i tātou nā te Atua 'e « e aroha ho'i te Atua » (1 Ioane 4:8). I te tāmā'ara'a hope'a, 'ua parau fa'ahou te Fa'aora ē : « 'O te mea teie e 'ite ai te ta'ata ato'a ē, e pipi 'outou nā'u, 'ia aroha 'outou ia 'outou iho » (Ioane 13:35).

Te fa'auera'a e here i te tahi 'e te tahi, 'o rātou ato'a ia 'aita e hi'o nei i teie nei ao mai ia tātou nei. Mai tā Elder Dallin H. Oaks i ha'apāpū mai :

« I roto i te mau autā'atira'a 'e i te mau huru e rave rahi o te orara'a, e tītauhia ia tātou 'ia ora 'e tera 'e tera ta'a-ē-ra'a. Mai te mea ē, e mea faufa'a te reira, 'eiaha tātou e huna 'e 'aore rā, e fa'aru'e i tō tātou nei ta'a-ē-ra'a, 'oia mau, 'ei feiā pe'e i te Mesia, e ti'a ia tātou 'ia ora ma te hau i pīha'i iho i terā mau ta'ata 'o te 'ore e tū'ati nei te mana'o i ni'a i tā tātou mau faufa'a 'e 'aore rā, 'o te 'ore e fāri'i nei i te mau ha'api'ira'a niu nō te reira. Tē tu'u nei te fa'anahora'a nō te fa'aorara'a a te Metua ia tātou, tā tātou i 'ite nā roto i te heheura'a, i roto i te orara'a tāhuti nei i reira e tītauhia ai ia tātou 'ia ha'apa'o i tāna mau fa'auera'a. 'O te herera'a ato'a ho'i i tō tātou mau ta'ata tupu nō terā 'e terā ta'ere, 'e terā 'e terā ti'aturira'a, mai iāna i aroha mai ia tātou nei. Mai tā te hō'ē peropheta nō te Buka a Moromona i ha'api'i mai, 'ia haere tātou i mua, ma te 'here i te Atua 'e te ta'ata ato'a' (2 Nephi 31:20) ». (« Te herera'a ia vetahi 'ē 'e te orara'a i roto i te ta'a-ē-ra'a », 'āmuira'a rahi nō 'ātopa 2014).

'Aita te here o te Atua e fāri'i i te hara—« 'aita e ti'a iā'u, i te Fatu, 'ia hi'o noa atu i ni'a i te hara ma te fa'ati'a i te reira »—tē tīa'i rū nei rā 'ia fa'a'ore i te hara « Noa atu rā i te reira, e fa'a'orehia te hara a te ta'ata 'o te tātarahapa 'e 'o te rave noa i te mau fa'auera'a a te Fatu » (PH&PF 1:31–32). Nā reira ato'a, 'eiaha tātou e tu'u i te orara'a 'e te pāururu'a i te mau fa'auera'a a te Atua, 'ia 'ānapanapa hope rā tātou i te here o te Atua, 'e e ti'a ho'i ia tātou 'ia here i te tahi 'e te tahi, i te here rahi 'e te hope, 'ia 'ore hō'ē e mana'o ē, 'ua fa'aru'ehia 'oia, 'ua 'ōtahi noa 'oia 'aore rā 'aita e rāve'a fa'ahou.

### **'Ua ta'a roa i te Fa'aora tō tātou mau fifi ato'a**

« Teienei ho'i, tē 'ite 'ārehurehu nei tātou mai te mea ē, i nā roto i te hi'o ; 'āre'a i reira, e mata ia 'e e mata : i teienei, tē 'ite pae tahi nei au ; 'āre'a i reira, e 'ite pāpū ia vau, mai iā'u ato'a i 'ite pāpūhia nei » (1 Korinetia 13:12).

'Ei ta'ata tāhuti, 'aita tātou e ta'a pauroa nei. Mai ia Nephi, e nehenehe tā tātou e parau ē : « 'ua 'ite [mātou] ē, 'ua aroha 'oia i tāna mau tamari'i ; 'āre'a rā, 'aita [mātou] i 'ite i te aura'a o te mau mea ato'a » (1 Nephi 11:17).

'A 'imi noa ai tātou i te mau pāhonora'a 'e te arata'ira'a nō tō tātou iho tere, e nehenehe ia tātou 'ia tu'u i tō tātou ti'aturira'a i ni'a i te Atua 'e i te mana i roto i te tusia tāra'ehara a Iesu Mesia. 'Ua rave Iesu Mesia i te mau hara o te ao i ni'a iāna 'e 'ua 'ite ato'a ho'i 'oia i te māuiui 'e te 'ati e fa'aruru atu te ta'ata nei :

« 'E e haere atu Iesu, ma te fa'a'orama'i i te māuiui, 'e te 'ati, te mau huru fa'ahemara'a ato'a ra ; 'e e nā reira 'oia 'ia fa'ati'ahia te parau tei nā 'ō mai ra ē, e rave 'oia i te māuiui 'e te mau ma'i o tāna mau ta'ata iāna iho » (Alama 7:11).

### **E 'ere te mau mana'o fa'ahina'arora'a ta'ata nō tōna iho 'āpeni i te hara 'e e nehenehe e mā'iti nāhea i te pāhono i te reira**

'Aita tā te 'Ēkālesia e fa'aotira'a pāpū nō ni'a i te tumu nō te fa'ahina'arora'a te hō'ē i te ta'ata nō tōna iho 'āpeni. I te matahiti 2006 ra, 'ua parau Elder Dallin H. Oaks :

« 'Aita tā te 'Ēkālesia e fa'aotira'a pāpū nō ni'a i te mau tumu o teie mau 'umera'a 'e mau hia'ai, nā reira ato'a te fa'ahina'arora'a te ta'ata i te ta'ata nō tōna iho 'āpeni » (uiuira'a mana'o a Elder Dallin H. Oaks rāua Elder Lance B. Wickman: « Same-Gender Attraction », i te matahiti 2006).

E 'ere te mau mana'o fa'ahina'arora'a ta'ata nō tōna iho 'āpeni i te hara. 'Ua parau Elder M. Russell Ballard :

« E parau pāpū tātou : Tē ti'aturi nei Te 'Ēkālesia a Iesu Mesia i te Feiā Mo'a i te mau Mahana Hope'a Nei ē, e 'ohipa 'ātitirau pāpū nō te mau ta'ata e rave rahi te fa'arurura'a i te fa'ahina'arora'a i te ta'ata nō tōna iho 'āpeni. E 'ere te fa'ahina'arora'a te hara, 'o te 'ohipara'a rā 'ia au i te reira. Noa atu ā 'aita te ta'ata e mā'iti nei 'ia fa'atupu i te reira huru fa'ahina'arora'a, e mā'iti rā rātou nāhea i te pāhono i te reira. Nā roto i te here 'e te hāro'aro'a, tē toro nei te 'Ēkālesia i tōna rima i te mau tamari'i ato'a a te Atua 'e tae noa atu [ia rātou e fa'ahina'aro nei i te ta'ata nō tō rātou iho 'āpeni] » (« The Lord Needs You Now! » Ensign, Setepa 2015, 29).

Noa atu ā e 'ere te fa'ahina'arora'a ta'ata nō tōna iho 'āpeni i te hara, e tāmatarā'a noa ā rā. Noa atu 'aita te hō'ē ta'ata i mā'iti 'ia fa'atupu i te reira mau mana'o, e nehenehe tāna e fafau iāna 'ia ha'apa'o i te mau fa'auera'a a te Atua. Te metua e tamari'i e fa'aruru nei i te fa'ahina'arora'a ta'ata nō tōna iho 'āpeni 'aore rā tei parauhia e pā'i'a, e ti'a iāna 'ia mā'iti 'ia here 'e 'ia tauahi i te reira tamari'i. E autahira'a melo o te 'Ēkālesia tātou, e ti'a ia tātou 'ia mā'iti 'ia fa'atupu i te autahira'a fāri'i.

« 'E tē ani nei 'oia i te mau ta'ata ato'a 'ia haere mai iāna ra, 'e 'ia rave i tōna ra maita'i ; 'e 'aita roa 'oia e fa'a'ore i te hō'ē tei hina'aro iāna ra... hō'ē ana'e tō te ta'ata ato'a ti'ara'a i mua i te Atua » (2 Nephi 26:33).

### **Te ta'ata e ora i te mau ture ato'a a te Atua, e nehenehe tāna e 'ohipa i roto i te 'Ēkālesia**

« 'Ua 'ite mau atura vau e 'ore te Atua e ha'apa'o i te huru o te ta'ata » (Te 'Ohipa 10:34).

Tē parau fafau nei te Atua ē, mai te mea e ha'apa'o tātou i tāna mau ture e 'oa'oa tātou ē a muri noa atu, 'e e tāpe'a noa ho'i 'oia i tāna parau. Pāpū roa te ta'ata e fa'aruru nei i te fa'ahina'arora'a ta'ata nō tōna iho 'āpeni, 'aore rā tei parauhia e pā'i'a, e nehenehe tāna e 'euhe 'e e ha'apa'o i tāna i parau fafau i mua i te Atua. E nehenehe tā rātou e haere i roto i tōna māramarama. E nehenehe tā rātou e 'āmui i roto i te 'ohipa a te 'Ēkālesia.

« Mai te peu, i roto i te hō'ē ta'ata, e fa'ahina'arora'a ta'ata nō tōna iho 'āpeni 'aita rā te 'ohipa pā'i'a [pētea], e ti'a i te feiā fa'atere 'ia turu 'e 'ia fa'aitoito iāna i roto i tāna fa'aotira'a e ora i te ture nō te vi'ivi'i 'ore 'e e ha'avī i te mau mana'o parau ti'a 'ore. E nehenehe tāna e fāri'i i te mau pi'ira'a i roto i te 'Ēkālesia. Mai te peu 'ua ti'amā 'oia 'e 'ua ha'apa'o i te tahi atu mau ture, e nehenehe ato'a tāna e fāri'i i te parau fa'ati'a nō te hiero 'e e fāri'i i te mau 'ōro'a hiero » (*Buka arata'i 2: Fa'aterera'a i te 'Ēkālesia*, 21.4.6).

'Ua parau te peresideni Gordon B. Hinckley ē :

« 'Ua here [tātou] ia rātou 'ei mau tamāroa 'e 'ei mau tamāhine nā te Atua. Tē vai ra paha te tahi mau hia'ai pūai tō rātou e 'ere i te mea 'ōhie 'ia ha'avī. Te rahira'a o te ta'ata e mau hia'ai rau tō roto ia rātou i terā 'e terā taime. 'Ia 'ore rātou e pe'e i taua mau hia'ai ra, e riro ia rātou i te rave mai te tahi atu mau melo o te 'Ēkālesia. Mai te peu ē, e 'ōfati rātou i te ture nō te vi'ivi'i 'ore 'e te mau fa'aturera'a mōrara a te 'Ēkālesia, e topa ia rātou i raro a'e i te fa'atitī'aifarora'a a te 'Ēkālesia, mai te tahi atu mau pu'era'a » (« What Are People Asking about Us? » 'āmuira'a rahi nō 'ātopa 1998).

Noa atu te vaira'a o te hō'ē ta'ata, e nehenehe tāna e tauturu i te 'ohipa a te Fatu i teienei ma te tīa'i ē, e fa'atae mai tōna ha'apa'o maita'i, i teienei 'e i muri iho, i taua mau ha'amaita'ira'a ra i parau-fafau-hia e te Atua i te ta'ata e ha'apa'o maita'i mai i te reira. 'Ua fa'a'ite Elder D. Todd Christofferson ē :

« E mau hōro'a tō te mau ta'ata ato'a ; e mau tālēni tō te mau ta'ata ato'a ; e nehenehe tā te mau ta'ata ato'a 'ia tauturu i te fa'atupura'a i te 'ōpuara'a a te Atua i roto i te mau u'i tāta'itahi. Te rahira'a o te mau mea maita'i, te rahira'a o te mau mea faufa'a—'e i te tahi mau taime te mau mea ato'a tei tītauhia i teienei—e nehenehe ia e fa'atupuhia i roto i te hō'ē orara'a e 'ere i te mea au roa. E rave rahi o 'outou e fa'aitoito maita'i nei. 'E 'ia ti'a mai 'outou 'o tē fa'aruru nei i te mau fifi rahi o te orara'a tāhuti nō te pāruru i te 'ōpuara'a a te Atua nō te fa'ateiteira'a i tāna mau tamari'i, 'ua ineine pā'āto'a ia mātou nō te pāturu ia 'outou. Tē fa'a'ite pāpū nei mātou ē, 'ua 'ite ātea te tāra'ehara a Iesu Mesia, 'e i te pae hope'a, e fa'a'ore ho'i te reira i te mea tei 'erehia 'e tei mo'ehia i te feiā tei fāriu atu iāna. 'Aore e ta'ata i fa'ata'a-ātea-hia 'ia fāri'i iti a'e i te mea ato'a tā te Metua i fa'aineine nō tāna mau tamari'i » (« Nō te aha te fa'aipoipora'a, nō te aha te 'utuāfare », 'āmuira'a rahi nō 'ēperēra 2015).

### **Te ture nō te vi'ivi'i 'ore, nō te mau tamari'i ato'a ia a te Atua**

'Ua riro te vi'ivi'i 'ore i te hō'ē tuha'a rahi nō te fa'anahora'a a te Atua nō tō tātou 'oa'oa. 'Ua parau te Peresidenira'a Mātāmua 'e te pupu nō te Tino 'Ahuru Ma Piti 'āpōsetolo :

« Te ture mātāmua tā te Atua i hōro'a ia Adamu 'e ia Eva 'o tō rāua ia ti'ara'a 'ei metua, 'ei tāne 'e 'ei vahine fa'aipoipo. Tē fa'a'ite pāpū atu nei mātou ē, te fa'auera'a a te Atua i tāna mau tamari'i nō te fānau fa'arahi 'e nō te fa'a'i i te fenua, tē mana noa nei ā ia. Tē fa'a'ite atu nei ā mātou ē, 'ua fa'auē mai te Atua ē, te mana mo'a nō te hāmanira'a i te ta'ata 'ia fa'ahipahia ia i rotopū ana'e iho i te tāne 'e i te vahine 'o tei fa'aipoipohia mai te au i te ture » (« Te 'utuāfare : E Poro'i i tō te Ao nei »).

Tē 'ōfati nei te mau 'atira'a [ta'otora'a i te hō'ē ta'ata] i rotopū i te tāne 'e te vahine fa'aipoipo 'ore, 'aore rā i rotopū i nā ta'ata hō'ē ā 'āpeni, i te hō'ē o te mau ture rahi roa a'e a tō tātou Metua i te Ra'i ma te ārai i tō tātou haerera'a mure 'ore i mua.

« Te ture vi'ivi'i 'ore a te Fatu 'o te ha'apaera'a ia i te mau 'atira'a i rāpae 'au i te fa'aipoipora'a i mua i te ture 'e te fa'aturi-'ore-ra'a i roto i te fa'aipoipora'a. E mea tano te mau 'atira'a i rotopū ana'e iho i te hō'ē tāne 'e te hō'ē vahine tei fa'aipoipo-ti'a-hia i mua i te ture. E hara te fa'aturi, te poroneio, te mau aura'a tāne tāne 'aore rā vahine vahine, 'e te mau peu vi'ivi'i, ti'a 'ore, 'e te faufau » (*Buka arata'i 2 : Fa'aterera'a i te 'Ēkālesia*, 21.4.5).

Te ta'ata ato'a e 'ōfati i te ture nō te vi'ivi'i 'ore, noa atu tōna huru fa'ahina'arora'a ta'ata, e nehenehe tāna e faite 'e te Atua nā roto i te tātarahapara'a.

« 'Eiaha 'oe e fa'aturi ; 'e 'o 'oia 'o tē fa'aturi ra, 'e e 'ore ho'i e tātarahapa ra, e hurihia 'oia i rāpae. 'O 'oia rā 'o tei fa'aturi ra 'e 'ia tātarahapa 'oia mai tōna 'ā'au ato'a ra, 'e 'ia fa'a'ore roa 'oia i te reira, 'e 'ia 'ore ho'i 'ia rave fa'ahou i te reira, e fa'a'ore ia 'oe i tāna hara » (Te Parau Ha'api'ira'a 'e te mau Parau Fafau 42:24–25).

---

*Nō roto mai i te mormonandgay.lds.org.*

## **Nō te aha e fa'a'ohipa i te parau « Fa'ahina'arora'a ta'ata nō tōna iho 'āpeni » ? Nō te aha 'aita e parau noa e « pā'i'a » ?**

Te fa'ahina'arora'a ta'ata nō tōna iho 'āpeni, 'o te fa'ahina'arora'a ia i roto i te hō'ē ta'ata, i roto i tōna tino, i roto i tōna moemoeā 'aore rā te hina'aro, e ta'oto i te hō'ē ta'ata nō tōna iho 'āpeni. Mai te mea tē fa'aruru nei 'outou i te fa'ahina'arora'a ta'ata nō tō 'outou iho 'āpeni, penei a'e e mā'iti 'outou, 'aore rā 'aita, e fa'a'ohipa i te hō'ē i'oa ta'a 'ē e ha'apāpū i te hia'ai pae 'āpeni nō 'outou. 'Ātīrā noa atu, 'ua riro te parau fa'ahina'arora'a ta'ata nō tōna iho 'āpeni 'ei parau anoha'a nō te reira huru ma te 'ore e topa roa i te hō'ē i'oa ta'a 'ē. Tē fa'a'ohipa nei te tahua 'Itenati i te reira parau 'ei mana'ora'a i te feiā 'aita i hina'aro e pi'i ia rātou i te hō'ē huru i'oa, e 'ere rā nō te pāto'i i te vai-mau-ra'a te tāne pā'i'a, te vahine pā'i'a 'aore rā te airua.

## **Nō te aha 'aita te tahua 'Itenati e paraparau nei nō te mau fifi hīro'a 'āpeni 'aore rā te mähū [transgenre], te paevahine 'e te paetāne ?**

E rave rahi parau tumu tei fa'a'itehia i ni'a i te tahua 'Itenati ('ei hi'ora'a, te faufa'a rahi nō te tauahira'a 'e te hāmani maita'i) 'o te tano nō te feiā mo'a e fa'aruru nei i te fifi hīro'a 'āpeni 'aore rā 'o tē parau nei ia rātou 'ei mähū. Noa atu rā, e mea ta'a 'ē maita'i te fa'ahina'arora'a ta'ata nō tōna iho 'āpeni 'e te fifi hīro'a 'āpeni. 'Ei hi'ora'a, te ta'ata e fifi hīro'a 'āpeni, e fa'aruru ato'a 'oia i te fa'ahina'arora'a ta'ata nō tōna iho 'āpeni 'aore rā 'aita, 'e te rahira'a o te ta'ata e fa'aruru nei i te fa'ahina'arora'a ta'ata nō tōna iho 'āpeni, 'aita tō rātou hina'aro e tau i tō rātou 'āpeni. Nō te hi'ora'a tahu'a manava 'e te utuutura'a, e mea ta'a 'ē nā mea e piti.

## **Tē uiui ra ānei 'outou e ta'ata pā'i'a ānei 'outou ?**

Mai te mea tē uiui ra 'outou e pā'i'a ānei 'outou, e riro paha ia ē 'ua fa'aruru 'outou i te fa'ahina'arora'a ta'ata nō tō 'outou iho 'āpeni 'e tē uiui nei 'outou nāhea i te hi'o i teie mau mana'o. E 'ohipa 'ātitirau te māramaramara'a i te mau hia'ai pae tino 'e 'ua rau te tumu terā mau hia'ai e tupu ai. E nehenehe te fa'ahina'arora'a moemoeā, te fa'ahina'arora'a i roto i te ta'ata 'aore rā te hina'aro e ta'oto i te ta'ata 'ia fa'a'ite i te huru hia'ai pae 'āpeni, 'eiaha rā 'outou e mana'o vave ē, 'o te reira mau. E mea tau i haere te hia'ai pae tino. Tē uiui ra te mana'o, 'eiaha rā te mana'o fa'ahepo 'aore rā te mana'o rū i te fa'aotira'a nō ni'a i tō 'outou orara'a 'āpeni.

E mea ta'a 'ē te aura'a o te hō'ē parau nō terā 'e terā ta'ata, 'e e nehenehe ato'a te aura'a o te parau e tau i te roara'a o te orara'a. E aha te aura'a o te parau *pā'i'a* nō 'outou ? E mana'o ānei ? E hīro'a ānei ? E huru orara'a ānei ? 'Ua tau i te aura'a o te parau *pā'i'a* 'a tau i te ato'a ai te sōtaiete 'e te ta'ere. 'Ia parauhia 'outou e pā'i'a, penei a'e tē vai ra terā fa'ahina'arora'a ta'ata nō tō 'outou iho 'āpeni 'aita rā i hina'aro e rave mai te au i te reira. 'Aore rā penei a'e e i'oa te reira e fa'a'ite i te huru 'o roto ia 'outou, tō 'outou huru pae tino, pae 'āpeni 'e 'aore rā pae politita. Mai te peu tē uiui ra 'outou e aha te aura'a 'ia parau te hō'ē ta'ata ē, « e pā'i'a vau », 'a ani atu ia rātou.

## **E ti'a ānei iā'u ia parau ?**

Nō te tahi mau ta'ata, 'ia vai 'ōmo'e noa terā mau mana'o fa'ahina'arora'a ta'ata nō tōna iho 'āpeni, e nehenehe te reira e fa'atupu i te ha'amā 'aore rā te hō'ē māna'ona'ora'a au 'ore 'o roto. E nehenehe te fa'a'itera'a i te reira mau mana'o i te hō'ē hoa pāpū e fa'aora 'e e rapa'au iāna. Nō te tahi rā, e mana'o rātou ē, 'āhani 'ua tīa'i ri'i ā rātou 'aore rā 'ua iti ri'i a'e te ta'ata tāna i fa'a'ite i tōna mau mana'o, e'ita ia tāna fa'aotira'a e fa'atumuhia i ni'a i te fa'ahēpora'a e « parau » i mua i te ta'ata 'aore rā 'ia parau-roa-hia e pā'i'a. Mai te peu 'ua fa'aoti 'outou e fa'a'ite i tō 'outou mana'o fa'ahina'arora'a ta'ata nō tō 'outou iho 'āpeni, 'a feruri nā roto i te pure 'o vai tā 'outou e parau atu 'e nāhea i te parau atu i teie huru 'ohipa o tō 'outou orara'a tāhuti.

Mai te peu 'ua fa'aoti 'outou e fa'a'ite i tā 'outou fa'arurura'a i te mana'o fa'ahina'arora'a ta'ata nō tō 'outou iho 'āpeni 'aore rā 'ia parau-roa-hia 'outou e pā'i'a, e ti'a 'ia pāturuhia 'outou 'e 'ia hāmani-maita'i-hia 'e 'ia fa'aturahia, i te fare 'e i te fare pure. Tītauhia ia tātou pā'āto'a 'ia fa'a'oroma'i i te tahi 'e te tahi 'a 'imi noa ai i te rāve'a.

'Ei melo nō te 'Ēkālesia, tei ia tātou pā'āto'a te hōpoi'a 'ia ha'amau i te hō'ē vāhi e pāturuhia 'e e herehia tō tātou mau taea'e 'e mau tuahine ato'a. Nā te reira natira'a fa'aitoito e fa'a'ōhie i te orara'a i te 'evanelia 'e te 'imira'a i te Vārua 'a fa'aruru noa ai i te huru rau o te orara'a tāhuti nei.

## **Nāhea vau i te paraparau i tō'u nā metua 'e tō'u 'episekōpo nō ni'a i te fa'ahina'arora'a ta'ata nō tōna iho 'āpeni ?**

Mai te mea ē, e mana'o hau tō 'outou 'ia paraparau i te hō'ē metua, te tahi melo o te 'utuāfare 'aore rā i te hō'ē ta'ata fa'atere o te 'Ēkālesia, 'a 'ōpua e fa'a'ite atu ia rātou i tō 'outou mau mana'o. 'A tauturu ia rātou 'ia māramarama i te mea tā 'outou e fa'aruru nei 'ia ti'a ia rātou 'ia fa'a'ite mai i tō rātou here 'e te pāturu. Mai te mea 'aita rātou e māramarama i te reira, 'a ani ia rātou 'ia tai'o i te mau parau ve'a i ni'a i teie tahua 'Itenati. E 'ere paha i te mea 'ōhie 'ia ha'amata i teie tāu'ara'a parau, e mea faufa'a rā 'ia paraparau i te reira. 'A fa'a'oroma'i i te ta'ata 'ati a'e ia 'outou 'e 'a ha'amana'o ē, 'outou pā'āto'a terā e ha'api'i ra. Mai te peu e fifi te mau ta'ata tei herehia e 'outou 'ia māramarama 'aore rā 'ia pāturu ia 'outou, 'a tauturu ia rātou. 'A fa'a'ite i tō 'outou metua 'e i te feiā fa'atere i te maita'i 'e te fa'atura tā 'outou e tīa'i nei 'ia fa'a'ite mai rātou. 'Ua 'ōpuahia teie tahua 'Itenati 'ei tauturu i te tā'āto'ara'a 'ia māramarama maita'i a'e i te fa'ahina'arora'a ta'ata nō tōna iho 'āpeni mai te au i te hi'ora'a o te 'evanelia.

## **'Ia nava'i tō'u ha'apa'o maita'i, e 'ore ānei tō'u fa'ahina'arora'a ?**

E 'ere te pūai o te fa'ahina'arora'a ta'ata nō tōna iho 'āpeni i te fāito nō tō 'outou ha'apa'o maita'i. E rave rahi ta'ata te pure e rave rahi matahiti ma te tauto'o rahi roa 'ia ha'apa'o ē tē vai noa ra terā fa'ahina'arora'a nō te ta'ata o tōna iho 'āpeni. E pūai ta'a 'ē 'e te rau e 'āpe'e i te fa'ahina'arora'a ta'ata nō tōna iho 'āpeni, e mea ta'a 'ē nō terā 'e terā ta'ata. Tē vai ra e fa'ahina'aro i nā 'āpeni e piti, 'e tē vai ra 'o tō rātou noa iho. Nō te tahi mau ta'ata, e marū mai te mau mana'o 'aore rā te pūai nō te fa'ahina'arora'a ta'ata nō tōna iho 'āpeni, i roto i te tau. 'Ātīrā noa atu, 'eiaha te taurira'a o te fa'ahina'arora'a e tīa'ihia 'aore rā e tītauhia 'ei fa'ahope'ara'a e nā metua 'aore rā e te feiā fa'atere.

'Aita paha tā 'outou e nehenehe e mā'iti i te pūai o tō 'outou fa'ahina'arora'a ; e nehenehe rā 'outou e mā'iti e nāhea i te pāhono i te reira. 'Ia ani 'outou i te Fatu e aha te mea e ti'a 'ia ha'api'ihia i roto i teie 'ohipa 'e nāhea te reira e riro mai 'ei pūai nō 'outou, e nehenehe ia te reira e fa'arōtahi i tō 'outou fa'aro'o i ni'a i te hō'ē fa'aotira'a e nehenehe tā 'outou e mā'iti. 'Ua riro te fāriura'a i tō 'outou ora i te Atua ra 'ei 'ohipa fa'aro'o faufa'a rahi 'o te fa'atae mai i te mau ha'amaita'ira'a rahi i teienei 'e te mau ha'amaita'ira'a rahi atu ā i te ao a muri a'e.



**E tauī ānei te 'Ēkālesia i tāna ha'api'ira'a tumu 'e te fa'au'ara'a nō te mau fa'aipoipora'a ta'ata nō tō rātou iho 'āpeni ?**

I te pū mau o te fa'anahora'a a te Atua, 'ua riro te ha'api'ira'a tumu nō ni'a i te fa'aipoipora'a te tāne i te vahine 'ei ha'api'ira'a rahi a Te 'Ēkālesia a Iesu Mesia i te Feiā Mo'a i te mau Mahana Hope'a Nei 'e e'ita te reira e tauī :

« 'Ei parau tumu niu, fa'atumuhia i ni'a i te mau pāpa'ira'a mo'a, tē ha'apāpū nei te 'Ēkālesia ē, e 'ohipa faufa'a tumu te fa'aipoipora'a te tāne i te vahine i roto i te fa'anahora'a a tei Hāmani nō te hope'a mure 'ore o tāna mau tamari'i.

« E mea tano te mau 'atira'a [ta'otora'a i te ta'ata] i rotopū ana'e iho i te hō'ē tāne 'e te hō'ē vahine tei fa'aipoipo-ti'a-hia i mua i te ture. Te tahi atu huru 'atira'a, noa atu te huru, mai te ta'otora'a o nā ta'ata hō'ē ā 'āpeni, e hara ia 'e tē tōtōā ra ia i te fa'anahora'a nō te 'utuāfare tei ha'amauhia e te Atua. Nō reira, tē ha'apāpū nei te 'Ēkālesia i te aura'a nō te fa'aipoipora'a 'ei tā'amura'a tei ha'amanahia e te ture ma te ti'a, i rotopū i te hō'ē tāne 'e te hō'ē vahine » (*Buka arata'i 2: Fa'aterera'a i te 'Ēkālesia, 21.4.10*).